

**NATIONAL ASSEMBLY OF  
SEYCHELLES**

*Sitting of Tuesday 22<sup>nd</sup>*

*February, 2022*

*The Assembly met at 5.07pm*

*National Anthem*

*Moment of reflection*

*Mr Speaker in the Chair*

**MR SPEAKER**

Ekselans Prezidan  
Larepublik Wavel Ramkalawan e  
Madanm Linda  
Ramkalawan,

Vis-Prezidan Ahmed Afif e  
Madanm Stella Afif,

Minis Dezinyen Jean-  
François Ferrari e lezot Minis.

Sef Ziz Lakour Siprenm  
Ziz Ronny Govinden e Prezidan  
Lakour D'Apel, Ziz Anthony  
Fernando.

Lezot Envite Distenge,  
Sekreter Deta Mohamed  
Afif,

COMPOL Ted Barbe,  
Sef Lafors Defans  
Brigadier Rosette,

Dirizan Lopozisyon e  
Dirizan Biznes Gouvernman  
dan Lasanble,

Tou Manm Onorab e  
manm piblik ki pe swiv nou  
ozordi, bonn apre midi.

Mersi pou zot prezans  
avek nou. I en plezir pou akey  
zot dan Lasanble Nasyonal pou  
nou fer louvertir travay  
Lasanble pour sa lannen. I en  
moman solannel pour  
Lasanble. Parey koutim e dapre  
nou *Standing Orders*, sa premye  
rankont i marke par en  
levennman spesyal e sa se  
mesaz Prezidan lo Leta  
Lanasyon.

I en loner pou resevwar  
Prezidan Ramkalawan pou son  
mesaz pou lannen 2022. Dabor  
mon pran detrwa mo pou mark  
louvertir Lasanble pou sa  
lannen. Mon asire zot pa'n  
manke note ki dat ozordi i  
annan en konfigurasyon spesyal  
22,02,2022;- en simetri  
aritmetik remarkab.

Mon pa'n al resers  
sinifikasyon astrolozik sa sif,  
me mon pran sa koman en siny  
ki pou en lannen remarkab pou  
Lasanble osi. Mon komans avek  
en swe Bonn Ane pou tou  
Manm e pou Nasyon Seselwa ki  
zot reprezante. Mon swet en  
byenveni 2 Manm  
Proporsyonnel ki'n rantre  
Lasanble ozordi, e zot in pret  
serman apre midi, e sa se  
Onorab Paul Ernesta lo kote US  
e Onorab Flory Larue lo kote  
LDS.

Mon swet tou Manm nou  
Lasanble en bon lannen travay

dan zot rol koman reprezantan Lepep Seselwa. I mon ekspektasyon ki lannen 2022 pou en lannen aktiv e prodiktiv pour nou lenstitisyon. Pandan ki nou a ranpli avek loner nou rol koman en brans Gouvernman nou pei.

Parey nou ganny rapel souvan, nou en brans endepandan e avek bann devwar e responsabilite ki ganny definir dan nou Konstitisyon, atraver bann latas ki'n ganny dezinyen; setadir pou diskite e pas Lalwa ki nou pei i bezwen, pou son bonn gouvernans e osi pour sirvey e evalye programm e performans L'Egzekitiv.

Parey i ganny dir souvan nou anmenn son *check and balance* ki neseser dan en sistenm demokratik. Lannen pase an komemorasyon Lazournen Parlmanter, nou ti adopte en novo lafis pou nou Lasanble ki nou'n plas par lao nou larantre prensipal. E sa se "*Serving a Modern Democracy.*"

Mon tenir aker sa slogan koman deskripsioun nou misyon akoz in reprezant laspirasyon ki nou annan pou travay sa Lasanble, ki mon ekspekté pou a delivre avek sa loner ki nou'n sey fer li toultan.

Nou oule deservi piblik Seselwa an aplikan en sistenm

demokratik modern ki travay pou bonn gouvernans latransparans e pratik rann plennman kont avek nou Nasyon.

Sa latas nou pou antreprann li dan lespri nou Moto pou Lasanble ki lo nou paviyon e sa se "Linite dan Diversite." Nou diversite i ganny reflekte par lefe ki nou konpoze par 2 parti politik, me nou oule osi rapel son lot kote, linite. Nou la koman en sel Lasanble e sa i devret antre dan lafason ki nou travay e i devret reflekte nou misyon.

Sa levennman prensipal ki nou antreprann ozordi, mesaz Prezidan lo Leta Lanasyon, i demonstre nou langazman avek L'Egzekitiv dan Gouvernman nou pei.

Mesaz Prezidan i prezant vizyon L'Egzekitiv lo sityasyon ki nou pei i ladan e direksyon ki zot propoze nou ale. Dan zot repons, bann Dirizan Lasanble e bann Manm Onorab pou ganny loportinite pou donn zot pwennvi lo sa 2 keksoz, kote nou Nasyon i ete e ki nou bezwen anmennen pou fer li meyer.

A sa pwen, i mon loner pou deklar ofisyelman ouver lannen travay nou Lasanble, e pou envit Prezidan Larepublik pou prezant avek Lasanble

Nasyonal e pou latansyon Lepep Seselwa an antye, son mesaz lo Leta Lanasyon. Prezidan mon annan plezir envit ou pou pran laparol.

### **THE PRESIDENT MR WAVEL RAMKALAWAN**

Mersi bokou Mr Speaker.

Mr Speaker,  
*Leader Lopozisyon,*  
*Leader Zafer*

Gouvernman,  
 Depite Speaker Lasanble Nasyonal,

Tou Manm Onorab.

Vis-Prezidan Larepublik e Stella,

Sef Ziz e Prezidan Lakour Dapel,

Tou Minis,

*COPOL,*

*Brigadier,*

SS Afif,

*Monseigneur Harel,*

*Monseigneur Wong.*

Tou Seselwa,

Seselwa ki isi, Seselwa ki aletranze, nou tou ki annan en koneksyon avek Sesel,

E mon tre ser Linda.

Mr Speaker 16mwan dan lofis;- 16mwan dan en moman pli difisil dan listwar nou pei. Lemonn an antye ti resamble in aret roule. Nou lekonomi ti lo son zenou, lavenir ti paret enposib e enserten.

Mr Speaker i fasil pou nou obliy Oktob 2020, me i enportan pou nou gard Oktob 2020 devan nou, pou nou kapab fer refleksyon.

Oktob 2020 Dolar ti R22, Gouvernman ti a pe viv lo lavans ki Labank Santral i donnent. E nou konsern koman en Gouvernman, sete eski nou pou kapab pey travayer zot lapey lafen dimwan?

Nou konsern pa ti si travayer pou ganny trezyenm mwan, si travayer pou ganny *bonus*, me sete eski zot pou ganny en lapey lafen dimwan? Pou zot kapab met manze lo latab zot fanmir, pou zot kapab abiy zot zanfan, pou zot kapab donn tou manm zot fanmir lankourazman ki neseser.

Mr Speaker detrwa zour oubyen detrwa semenn apre ki nou ladministrasyon ti'n rapport eleksyon nou sistem lasante ti komans fer fas avek *COVID*. Lopital Anse Royale, Lopital Sesel, Lopital Lafanmir, Praslin avek La Digue, tou nou servis Lasante ti komans resanti lefe *COVID*.

Me ozordi le 22, 2enm mwan 2022, atraver planifikasyon serye e *management* konkret, nou deza lo larout pou nou avans pli devan. Sa Gouvernman pa ti tarde pou li pran aksyon

konkret e se sa ki anmenn nou ozordi letan nou pe regard Leta nou Nasyon.

Dan en pti git letan plis ki R60milyon ti'n ganny kontribye dan fon *COVID*, nou lekonomi ti pe komans war en pti lalimyer, Sesel ti rante dan en programm vaksinasyon agresiv depi Zanvye 2021, e koman Prezidan Sesel mon ti vin premye Sef Deta Lafrik pou pran sa vaksen.

Prezidan Danny Faure ti swiv mwan, 2enm dimoun pou pran sa vaksen e ansanm avek Gouvernman tou Manm Cabinet e bann Manm Lasanble Nasyonal nou ti antre dan en nouveau letap. E se sa ki ti permet nou pou nou re ouver nou pei le 25 Mars 2021.

Mr Speaker pep Seselwa nou ti ouver nou pei dan en moman kot bokou dimoun e bokou pei ti annan serten lafreyer, zot ti panse ki poudir sa ki nou pe fer i fou. Me nou bann dimoun ki'n kalkile, bann dimoun ki pare pou pran desizyon, nou ti fer li.

E an menm tan ki nou ti fer sa, e an menm tan ki *COVID* ti ravaz nou kominote ki nou ti fer? Nou ti konstrir en fasilite Lopital dan 17 zour pou mou kapab akey 40 pasyan. Pli tar nou ti refer latant - sa Lopital latant ki *Qatar* ti'n donn nou 25 zour.

Dan sa kourt letan nou'n anmenn 2 lezot *oxygen plants*, Nou'n anmenn *freezer* pou nou kapab stok vaksen *Pfizer* e an plis ki nou'n fer bokou bann lezot keksoz.

Alor Mr Speaker mon anvi premyerman dir avek pep Seselwa, fodre pa ki nou pran okenn keksoz koman en donnen, me o kontrer fodre ki nou tou sa pep Seselwa, nou tou ki pe swiv, nou realize ki poudir sel fason pou nou pei avans devan, sel fason pou nou pei *attain* bann lobzektif vreman nob, se pou nou fer bon planifikasyon.

Se pou nou regarde ki sak sou ki nou pei i gannyen i byen ganny depanse, e apre sa fodre ki i annan limite parmi sa pep. Wi pep Seselwa, se nou limite ki'n anmenn nou ziska kot nou ete. E alor an kolaborasyon avek sa pep Seselwa ki vreman donn mwan en gran lafyerte, nou'n travay dir e nou devret fyer koman en Nasyon.

Me Mr Speaker pa zis Lepep Seselwa avek nou bann imen ki'n permet nou ariv kot nou ete. Zour koman lannwit mon pa zanmen aret remersye Bondye Tou Pwisan ki'n beni nou pei, ki'n beni nou Nasyon, ki'n montre nou direksyon. Anba son gidans nou'n ganny proteze koman en pep.

E ozordi nou dir premyerman avek Bondye Tou Pwisan mersi bokou pou sa lanmour spesyal ki ou annan pou Sesel e pour tou Seselwa. Mr Speaker dan sa lespas letan ki mon pe koz lo la, e letan mon pe adrese ozordi, nou rezerv son total i \$702milyon. E nou rezerv *net savedir* sa ki pou nou an antye i \$529milyon. Zanmen sa in deza arive.

E Mr Speaker mon anvi osi dir avek Lepep Seselwa, ki dan milye tou sa difikilte ki nou'n pas ladan, menm si nou konpar bann sif, bann viziter ki'n antre dan nou pei an 2019 avek 2021.

Menm si an 2019 nou ti resevwar pres 400mil viziter e lannen pase nou'n resevwar 180mil viziter, mon anvi dir avek pep Seselwa ki reveni ki nou'n anmase avek Lendistri Touris an 2021, i bokou pli o ki an 2019. Se sa travay ki nou'n fer e sa kot in anmenn nou.

Mr Speaker ozordi set avek en gran lafyerte e mon konnen ki Minis Lasante i partaz sa menn lafyerte e sa menm lazwa. Mon anvi dir avek Lepep Seselwa atraver bon *management* sa sityasyon *COVID*, ozordi tou bann facilite kot *Coast Guard* napa okenn pasyan. Nou annan nou zis 8 pasyan kot *Family Hospital*.

Se la kot nou'n arive, e se sa ki ankor enn fwa i fer nou fyer. Ozordi letan mon pe adres zot nou *rolling average* i 50. E nou annan nou 541 ka aktiv. 85 poursan nou popilasyon in pran premye doz vaksen ; 80 poursan in pran tou lede doz e 33 poursan in fini pran *booster dose*. E nou lazenes osi tou en gran poursantaz parmi zot, zot in fini ganny vaksinen.

Alors Mr Speaker avek sa progre ki nou pe fer, mon pou *Chair* en *meeting Platinum* sa semenn e dan sa *meeting*, e mon konnen poudir Seselwa pe esper sa - dan sa *meeting* nou pwen prensipal lo nou azanda, se pour nou regard bann restriksyon ki egziste la pou le moman.

E mon kapab deza dir avek zot, ki nou pa al dan direksyon pou nou soulaz plis sa bann restriksyon pour ki nou pep i kapab ankor enn fwa respire. Nou tou nou anvi, nou anvi kapab ganny en pe plis laliberte. Nou anvi kapab vizit nou paran, nou anvi kapab ale e melanze avek kominate. Alors nou ava pran sa desizyon sa semenn.

E ozordi Mr Speaker mon anvi fer lapel avek tou lakominote relizye e tou Lepep Seselwa, pou dedye sa wikkenn ki pe vini koman en wikkenn

aksyon de gras depi Vandredi. Aksyon de gras pou remersye Bondye pou sa ki nou'n arive fer.

E sa aksyon de gras i ava termin dan en selebrasyon milti lafwa le 28 Zanvye, le 28 Fevriye anler *State House*, kot ankor enn fwa nou pou tourn ver Bondye egzakteman parey nou ti tourn ver li letan nou ti lo nou zenou. Me la nou pou retourn ver Bondye pou nou remersye li e pou nou loue li pou lafason ki in pran swen avek nou.

Mr Speaker ozordi kot Sesel in arive, mon anvi dir avek Lepep Seselwa ki malgre bann *challenges*, bann defi ki nou ankor pe fer fas avek, nou lo bon semen. Sa mon krwar napa personn ki kapab renye. Nou lo bon semen.

E alors ozordi mon anvi dir avek Lepep Seselwa kot ki mwan mon krwar ki nou pe viv dan en pei ki stab, kot sanzman politik e tranzisyon in fini ganny aksepte. Nou'n vin en pep ki'n anbras la demokrasi, en pep ki konpran ki sel fason pou li sanz son Gouvernman se atraver bwat vote.

Nou en pep kot son Lafors ladefans e kot tou dimoun ki annan en keksoz pou fer avek sekirite in montre zot lwayote anver Leta e anver paviyon. E sa Lafors Defans reprezante

tanto par *Brigadier Rosette* in vin lafyerte nou pep. Zot pe azir koman bann profesyonnel.

E mwan koman Komandan Sef Lafors, mon pa mank okenn lokazyon pou mwan dir wi sa lafors ozordi i ape kontinyelman grandi e zot pe fer Lepep Seselwa konn en vre lafyerte. Alor mon dir avek zot kontinyen dan sa direksyon e pou tou bann zenn ki ozordi i dan sa lafors, mon konnen ki poudir parfwa zot santi serten dekourazman e mwan mon pe pran li koman mon responsabilite ansanm avek *Brigadier*, pou nou regard ki mannyer nou lafors i avans pli devan.

E zisteman Mr Speaker mon anvi osi dir avek Lepep Seselwa, ki nou pe viv dan en vre demokrasi e napa okenn telefonn ki ganny ekoute! Sa bann letan kot i annan lespyon ki viv an deor ou lafnet pou ekoute ki ou pe dir, in fini. E ozordi tou dimoun i kapab eksprim li, menm bann ki napa okenn mesaz i kapab eksprim zot lekor.

**(APPLAUSE)**

### **THE PRESIDENT MR WAVEL RAMKALAWAN**

Ozordi Mr Speaker nou annan nou pe pep ki dousman,

dousman pe realize ki poudir travay dir i pa en fardo, me ki travay dir i moralman bon pou nou e ki edikman se sa ki nou devret fer.

E an menm tan *tax payers* zot pe demande ki zot larzan ki zot kontribisyon i byen ganny itilize. E zot lekspektasyon set en pei kot napa koripsyon, oubyen en pei ki lager kont koripsyon kot i egziste, en pei kot i annan respe pour drwa sak endividé e kot sa pei i delivre bann servis apropriye. Wi ozordi drwa tou nou sitwayen i ganny respekte.

Mr Speaker nou bann zanfan in montre nou ki zot osi tou zot in konpran sa mesaz, e zot in montre nou atraver zot bann rezulta, bann meyer rezulta ki nou'n gannyen pandan en kantite lannen, ki poudir zot osi tou zot pou kontribye dan konstriksyon sa novo pei, sa pei ki fer nou leker bat for. Sa Lim Nasional ki letan nou sant li, parey zot in sant li avek sitan labote e letan nou pavyion pe monte ki poudir zot osi tou zot form par sa pei.

Mr Speaker en pei kot zom ek fanm ki ti lo *URS*, in rantre dan lanplwa a plen tan, kot ozordi zot pe fer zot kontribisyon pansyon e i annan bokou ki pe resevwar en lapey 2 fwa sa k zot ti pe gannyen dan

*URS*. E i menm annan ki'n komans zot prop biznes e pe fer 4 fwa an plis ki sa ki zot ti gannyen dan *URS*.

Mr Speaker set en pei kot i annan plis konfyans parmi bann envestiser, kot ankor enn fwa *FDI* pe rantre, kot nou trouv bann gran konstriksyon pe ganny fer. E alor Mr Speaker mon lenvitasyon pou Lepep Seselwa, se pou dir avek nou tou sa i apel nou pei sa, sa i apel nou pei Sesel e pti Sesel me selman lo lasenn enternasyonal isi menm nou vreman anmenn lafyerte.

E alor mon envit tou Seselwa, pou nou sant dan menm liv kantik, be annou sant menm kantik. E dan sa fason nou tou nou ava pe anmenn nou pei dan menm direksyon. Alor Mr Speaker mon anvi dir avek Seselwa i nepli moman pou nou koz lo sanzman. Ozordi sanzman in fini arive!

**(APPLAUSE)**

### **THE PRESIDENT MR WAVEL RAMKALAWAN**

Ozordi nou koz lo transformasyon nou sosyete. Transformen e dan sa transformasyon ki mon deza war pe arive, lakle se ki nou tou nou donn tou sa ki nou annan.

Nou performans i vin alaoter e nou menm rod en fason pou nou al pli o, pou nou parey nou dir an Angle *go the extra mile*, pou nou vin pli konsyansye. Pou nou realize ki poudir letan *mwan* koman en endividé mon donn sa ki meyer anndan *mwan*, se mon fanmir ki benefisyé, se mon sosyete se mon kominote i benefisyé.

Me par lao tou se *mwan*, akoz mon ganny *mwan* en nouvo sans konfyans e sa nouvo sans konfyans i fer ki *mwan* menm *mwan*, mon donn mon lekor plis respe e atraver sa respe mon gard *mwan* lo en oter ki akseptab.

Mr Speaker dan sa Sesel ki nou'n kree e ki sa transformasyon pe kontinyen arive, mon bezwen dir napa plas pou medyokrite, napa plas pou lapares, napa plas pou en latitud mon tanpi! Non. Sakenn i bezwen demande kwa ki mon pe prodwir apre en lazournen travay?

Kwa ki mon'n aprann koman en etidyan, apre ki mon'n asiz en lazournen dan laklas? Kwa ki mon pe fer pou *mwan* amelyor mon landrwa travay? E pour zot isi dan sa Lasanble, ki bann *leaders*, e bann osi ki pa Lasanble, zot bezwen demande, kwa ki mon pe fer, koman en *Leader*? Ki

mannyer eski mon diriz *mwan* lorganizasyon? Ki mannyer eski mon pe fer mon lorganizasyon grandi e fer li briye?

Alor eski letan ou a pe fer tousala, ou santi ki poudir ou konfyans ki ou annan dan ou lekor, i vin plis, ou santi sa nesesite pou ou aprann plis. E ou santi, ki poudir ou a pe rann Lepep Seselwa atraver pozisyon ki ou annan dan sa sosyete Sesel, ou a pe rann zot en pli gran servis.

E atraver sa, ou a pe ed ou zanfan, ou a pe ed *mwan* zanfan, ou a pe ed tou zanfan Seselwa grandi. Parski annou pa blyie, Sesel i pour tou son zanfan. Alors annou mazin tou zanfan Seselwa.

Alor Mr Speaker sa transformasyon ki mon pe koz lo la, e ki ozordi i enportan, se atraver nou performans, pou nou konstrir en Nasyon ini, pou nou konstrir nou pei.

E la mon anvi remersye tou bann dimoun ki travay dan servis piblik, ki pe donn sa ki meyer. I annan en kantite zot ki pe donn sa ki meyer. *Weekend* zot pe regarde ki mannyer zot pou pas dan bann *file*, pou zot kapab ed en frer en ser Seselwa.

Me mon bezwen osi, anmezir ki mon konpar bann ki pe donn tou, pou *mwan* eksprim mon dezapwentman

avek sa bann ki zot lipye drwat, i kole lo fren, e zot lanmen gos i lo fren armen.

Mon pa kontan avek sa. Parski zot lentansyon se pour fer sa pep fristre. E nou dan sa ladministrasyon, nou pa anvi sa fristrasyon. Alor mon bezwen, malerezman dir direkteman pour ki letan zot kontinyen kit zot lipye lo fren, kontinyen kit zot lanmen lo fren armen. E zot ganny dir zot performans pa alaoter, e alor zot pou bezwen aret travay, ki personn, pa azir konmsi zot pa'n ganny okenn *warning*.

E nou'n ganny nou 16mwan, e nou vvar sa bann ki pas zot letan, azir dan sa fason. E pou nou kapab fer sa pei bouze, fodre ki sa osi tou i sanze.

La mon anvi osi remersye, tou bann dimoun dan sekter prive. Parske ozordi sekter prive vreman pe vin sa vre, moter nou lekonomi. E Minis Finans in fini prevwar, ki poudir atraver zot performans, sa lannen ki pe vini, zis, e pourtan nou'n fer desann bann to *tax*. Me malgre ki nou'n fer desann, sa lannen nou pou fer, nou pou ramas plis *tax*. Akoz, i annan plis biznes ki a pe travay, i annan plis biznes ki pe debourye.

Alors sekter prive ek tou bann envestiser, Sesel i dir zot,

mersi bokou pour sa ki zot pe fer.

Mr Speaker dan sa transformasyon, se pour sa rezon ki nou'n sanz sa non *DPA*. Nou'n anvi ki dimoun i kite sa, sa vye model, ki parfwa ti ganny servi koman en leskiz, e ki parfwa ti pe tro kontrole.

Ozordi e byento, pou annan en prezantasyon isi devan Lasanble, Kot Mrs Shella Mohideen, nou nouveau, nou nouveau *Chief Secretary*, ki pe osi fer sa lantrennman atraver *Guy Morel Institute*, ki pou vin sa *Civil Service College*, i pou vini pou eksprimen, pou eksplik zot, ki mannyer sa *Civil Service* pou transformen. E ki mannyer pou annan plis lotonomi dan bann Minister e dan bann diferan Departman.

E sa i ava fer ki performans i ava kapab pli byen ganny *assessed*. E non selman performans i ava pli byen ganny *assessed*, me avan ki nou rod, plis larzan, plis logmantasyon, oubyen plis resours. Nou ava osi demande, ki mannyer eski sa resours ki mon pe rode, pou ede pou amelyor sa travay.

Mr Speaker sa ladministrasyon, i pe dir avek Lepep Seselwa, nou serye. E alor nou pe dir avek tou travayer, zot osi tou, vin serye, pa bezwen elimin ou lekor dan

sa prosesis. Me o kontrer fer sir ki ou form parti sa prosesis pour ou anmenn lafyerte.

Donk dan sa menm lespri, e sa ki nou'n eksperyanse. E mon vwar ki poudir, nou pei pe al dan sa direksyon. Nou bezwen etablir bann pli o standar posib dan tou sa ki nou fer. E atraver sa, Seselwa i ava ganny rekonnet. Parey nou bann zanset ki ti fer, ki ti konstrir *State House*, ki ti konstrir *Domus*, ki ti konstrir Imakile Konsepsyon, ki ti konstrir *La Salle D'Œuvres*, ki ti konstrir tou sa bann gran batiman ki'n fer semen otour Mahé.

Parey nou bann zanset ki ti donn tou, ki ti travay, ki pa ti bezwen travayer sorti aletranzes pou fer sa, nou osi tou, nou a ava kapab reganny sa lafyerte, koman bann dimoun ki travay.

E la mon anvi dir zot, e se pour sa rezon ki nou Gouvernman in pran en, en *stance* vreman serye lo sa size *GOP*. E ki anmezir, ki nou'n met Seselwa dan lanplwa nou'n kapab, apre sa, larg en pe plis sa *GOP*.

Mon ava dir zot ki mwan, mon vreman ofanse. Letan mon tann en envestiser i vini, i a pe rod en poursantaz travayer etranze pou travay dan son letablisman.

Me selman an menm tan mon konpran li, me nou ki bezwen sanz sa. E si nou sanz sa, la nou ava profite. E la nou ava kapab, koz en pe for.

E la Mr Speaker mon anvi osi, dir avek ou, e dir avek Lepep Seselwa. Dir avek tou bann, tou bann *leaders* ki dan nou Lasamble. Ki poudir letan mon vizit - letan mon kit Sesel, parey zot in vwar. Mon pran li koman e devwar pour mwan rankontre Seselwa ki viv aletranzes.

E sak fwa ki mon'n zwenn bann Seselwa. La semenn pase mon'n zwenn trwa group Seselwa *Belgique, Brest* avek *Paris*. Sa ki ankouraz mwan, e avan sa mon ti zwenn zot en lot group *Addis Abba*.

Sa ki ankouraz mwan, se mon vwar bann Seselwa, ki pe travay dir. Bann Seselwa ki pe met zot talan a dispozisyon sa lorganizasyon kot zot pe travay.

Me letan ou al Lerop, letan ou regard bann Seselwa, ki letan liver i pe tap a son plen. Letan tanperatir, letan ou leve i mwens 2, mwens 3, mwens 5. Me selman sa Seselwa pe leve, pou li al rann lapel.

Be mon dir be, dan nou Seselwa nou annan nou, nou annan en leta lespri ki for. Nou annan en keksoz anndan nou,

koman bann dimoun ki sorti lo zil. Ki vreman for en kantite.

E alor be si nou bann frer ek nou bann ser dan lafreser pe leve, be akoz ki nou, nou pa kapab leve nou osi dan bomaten, pour nou travay e pou nou prodwir? E sa bann dimoun, napa Sekirite Sosyal pou zot al tap laport. Zot bezwen fer sa. E se sa ki permet zot pou zot nouri zot fanmir. E la mon anvi ki sa menm latitud, i renye parmi nou pep.

Alor Mr Speaker, parey nou tou nou konnen i kontinyen annan sitan pozisyon, ki pe ganny okipe par etranze. Akoz ki nou, nou pa kapab ranpli sa bann pozisyon? I annan sitan etranze, ki nou Seselwa i pli kalifye ki zot.

Alors mon osi demande, ki dan tou bann landrwa travay. Idantife bann Seselwa, ki kapab ranplas en etranze. E fer ki sa Seselwa i ava ganny sa travay.

E la mwan osi dir parey ki mon'n toultan dir, ou sa Seselwa pa bezwen zis les etranze vin pran ou plas. Be ou osi tou, debout, leve, e pa bezwen les ou pei tonbe. Me o kontrer debout e fer ou ganny konte.

Alors, mon anvi felisit ankor enn fwa, tou bann Seselwa, ki pe fer ekstrememan

byen. Mon zwenn zot toulezour. Mon anvi felisit zot, e mon anvi dir avek zot kontinyen akoz zot fer nou pei, vreman fyer.

Mr Speaker, letan nou pe koz lo protez nou pei pour en meyer demen, i enportan pou nou osi dir, e pou mwan espesyalman dir, avek pep Seselwa, ki dan sa transformasyon ki nou pe koz lo la, fodre ki nou tire dan nou lespri sa latitud, kot Gouvernman ki pou fer tou keksoz. Annou silvouple sanze lo, sanze sa. Parski dan sa transformasyon se pa Gouvernman ki pou fer tou keksoz.

Gouvernman i ava en fasilitater. Me mazinen ki poudir tou keksoz i komans avek ou. Sa etidyan, letan ou ganny bon mark, dan ou legzanmen se parski ou ki'n etidye.

Dan menm fason, sa travayer, letan i delivre byen e i ganny en promosyon, se parski, ou ki'n travay. Meritokrasi parey nou dir, se sa ki pou anmenn nou pli o. Ki pou fer nou kapab grenpe. E anmezir ki nou perfeksyonn nou lekor, nou ava kapab ariv pli o.

E se sa, ki pou donn nou sa meyer, demen. En meyer demen, kot nou konn nou

priyorite e kot nou konnen. E nou tou ki la, mon espere, nou tou ki la, nou konnen ki poudir sa meyer demen, oubyen kot nou'n arive in vin atraver sakrifis. Ki poudir nou'n bezwen fer sakrifis.

I annan moman kot petet nou'n travay san pran en *lunch break*. I annan moman kot nou'n, asize akoz nou anvi, rezourd sa sityasyon. Kot nou'n travay ziska 2er bomaten. I annan bann moman kot nou'n annan nou zis detrwa erdtan sonmey. E menm la sa sonmey pa'n tro vini.

Alors Mr Speaker, nou bezwen protez nou pei anmezir ki nou donn tou. E la, silvouple pep Seselwa, annou protez nou pei. Kriminalite kont bann viziter, pou senpleman detri nou lendistri touris, e nou lekonomi. Sa bann zimaz ki pe sirkile, lo lans Port Launay, i pa donn nou okenn lafyerte. E aksyon apropriye pou bezwen ganny pran.

Letan nou trenn nou lipye, dan nou landrwa travay, sa ki nou pe fer, nou ape anpes Seselwa, ganny en meyer standar lavi. Letan nou pa planifye nou lavenir koman en zenn, me nou plito les nou ganny trennen dan tou kalite vis, sa pou fer ki nou demen pou ganny brize.

Letan nou tou ansanm, nou pran en lot latitud. La nou ava pe protez nou pei, la nou ava pe debout pou nou kominote, la nou ava pe lager kont tou bann kont tou bann ditor ki detri li.

E an menm tan nou ava pe lager kont sa pli gran fleo, ki kontinyen tous tou nou bann zenn, e tous nou popilasyon e fer zot vin zonbi. E fer zot rantre dan tou sa bann kriminalite. E sa se drog, tou sa bann dernyen krim ki'n arive. I annan drog ki *involve* ladan.

Alors silvouple Seselwa, Gouvernman pe fer son bout, mon envit zot tou, pou zot osi fer zot bout. Pa bezwen gat sa bann resours ki Leta i annan e osi ki zot, zot in prodwir dan en fason initil.

Alors Mr Speaker, ser, frer Seselwa, nou bezwen koman en pep dan sa transformasyon, osi transform nou bann kominote.

Nou bezwen kapab anpeste ki vyolans i kontinyen vin en fason fer pou nou bann zenn. Sa vyolans mon'n deza koz avek Komisyoner Lapolis. E nou pe dir nou pou bezwen aret li. Parski i pe tro ale.

E mon annan sa konfyans, ki poudir Lapolis pou fer sa ki zot devret fer.

E la Komisyoner Barbe mon anvi felisit ou, pour ou

*leadership* ki ou pe montre. Ozordi i deza annan sa transformasyon ki pe arive dan Lapolis. E sirman zot in remarke ki poudir krim, ozordi i ganny detekte. Lontan ki krim pa ti ganny detekte. Ozordi en krim i arive, demen oubyen apredmen, sa dimoun i ganny atrape, e i ganny anmennen devan lazistis. Kontiny sa bon travay.

Me selman an menm tan, parey nou'n fek fer apre midi, apre midi mon bann zanmi, malerezman, nou'n bezwen siny en papye pou sispann en Asistan Sirentandan. La letan nou pe koze, i annan gard ki dan kaso ki'n partisip dan aksyon krim.

Sa pa kapab kontinyen. Pli boner, tar lannen pase, mon'n bezwen osi sispann en Sirentandan, en Sef Sirentandan Lapolis akoz son konportman, pa ti annord.

Alor i enportan pou nou osi regarde. E la mon lans en lapel avek Lafors Lapolis. Letan ou met, sa kas ki lo la i annan Lanblennm Sesel, ou devret pe mars avek loner. Ou devret pe servi ou pei avek loner. E ou, ou pa devret pe *involve* dan okenn aksyon kriminel.

Alor Mr Speaker, nou bezwen fer sa. I annan en gro travay la. Bann nwizans dan

kominote, mank respe, labi nou bann zanfan. E la mon kontan ki poudir Lakour in pran en lapros vreman strik. Sef Ziz, mon anvi felisit Lakour. E mon demande ki poudir nou kontinyen dan sa direksyon.

En adilt ki abiz en zanfan anba 10an - ki abiz en zanfan, *sorry* i annan en problem avek li. E nou sistenm legal i bezwen pran aksyon. E la ansanm avek Biro Attorney Zeneral, nou pe koze lo ki mannyer sa bann ka labi, i kapab pas pli vit. Parski souvandfwa letan i tarde, bann zanfan i ganny enflyanse dan tou kalite direksyon. E larzan i marse, lot kalite keksoz i marse e lazistis pa ganny fer.

E mon konnen ki poudir, dan nou bann kominote, i annan bokou dimoun ki dir, be ki arive avek sa bann dimoun ki vole, ki ganny anvoy prizon pou de mwan, trwa mwan, apre sa zot retourn ankor e zot rekomans vole.

Sa osi tou i en refleksyon ki mon demann Lasanble pou fer, pou nou regarde ki mannyer nou *tackle* sa bann *repeat offenders*, ki fer en kominote ganny terorize.

Personn pa devret kapab pran okenn dimoun otaz. Se pa sa pei ki nou pe rod konstrir. Alors bann dimoun ki krwar ki poudir, zot pa kapab viv dan sa

kominote, fodre ki Leta i pran aksyon neseser, pou nou kapab bouz devan.

E la pep Seselwa, vreman mon anvi ki nou pei i vin en Nasyon, ki atas li toulstan avek laverite. Nou sisyete ozordi pe ganny bonbarde avek tro bokou mansonz. E i malere poudir souvandfwa se bann zomm ek fanm byen edike ki a pe senm sa bann mansonz. E sa bann mansonz pa bon pou nou sisyete. Pa bon pou nou bann zanfan, pa bon pou devlopman nou pei.

Alors mon pe demande ki nou, dan sa transformasyon ;- premyerman sa bann zomm ek fanm adilt, si zot anvi al lo *Facebook*, be vin avek zot prop idantite. Pa bezwen apel zot lekor “Troukler”, “Deginyen”, “Gro ros,” sepa ki lot kalite ankor, “Pti Nesta” sepa ki lot zafer. Vin fran. Si ou annan en lopinyon pou ou eksprimen, eksprim sa lopinyon. Akoz ou devret kapab, ou lopinyon ou devret kapab fer li konte.

Akoz ki zot dan Lasanble isi, letan zot annan zot laliberte lekspresyon. E zot anvi koze, akoz ki zot pa, akoz ki zot, akoz ki zot fer li. E tou dimoun i konnen, ki poudir be sa se tel Onorab ki'n dir. Alors mon demande, ki lo *Facebook* osi, e dan tou sa bann landrwa, kot

nou pe senm sa bann, sa bann mansonz, ki sa osi i arete.

Me nou annan en lot, mon mwan anvi adres osi medya. Parski mon krwar ki poudir, medya i annan en rol spesyal. I bezwen rode, me i bezwen osi fer resers pour laverite. Rod sa laverite, pour ou kapab ede pou konstrir sa pei.

E bann ki, e bann ki annan sa bann, responsabilite. Mon ti ava kontan ki zot vin bann, bann *Richard Quest*, bann Christiane Amanpour. E san bliy nou prop defen Kevin Malbrook. Bann zournalist ki nou tou nou'n annan respe pou zot, parski zot in enterese pou zot fouye, pou zot konn laverite.

E lo nou kote dan Gouvernman parey nou'n fer, parey yer Minis Hassan in fek fer an relasyon avek lenvestigasyon lo *SEYPEC*, nou pou kontinyen donn lenformasyon. Nou pou kontinyen la, letan zot vin rod lenformasyon pou nou donn zot.

Me nou ekspekte ki letan nou donn lenformasyon, ki poudir zot osi fidel dan lafason ki zot partaz sa lenformasyon, avek Lepep Seselwa. E la mon osi anvi avek bann *MNAs*. Mon anvi dir avek bann *MNAs*, ki poudir dimoun i ekout zot byen.

E zot osi tou zot bezwen konn tou zot prosedir. Letan zot dir serten keksoz, dimoun i ekoute e i pran sa koman laverite. Lot zour mon'n tann en MNA, ki a pe, dan en *interview* lo en proze, i dir "mon'n rod dan Bidze mon'n pa'n vvar, sa sonm." Be Onorab, be si i en proze pou en departman ki pa *budget dependent*, ou pou rod dan Bidze lizour, lannwit ou pa pou vvar nanryen menm !

Annou rode, ganny lenformasyon apropriye, e partaz li avek sa pep. Alors MNAs, mon konnen ki poudir Speaker tanzantan i aret zot letan, i annan keksoz, ki pa apropriye. Me mon demann zot pou zot osi tou partisip ladan. E la mon osi fer en lapel avek bann dimoun ki fer bann *talk shows*. Parski ozordi se laliberte. Laliberte ki renye, lo SBC, partou *TéléSesel*.

Dimoun i kapab koz ki mannyer i anvi. Me sa bann dimoun ki pe *lead* sa bann *talkshows*, mon dir avek zot, zot annan en responsabilite spesyal. Sa se pour zot pli konnen ki bann dimoun ki dan zot lodyans. Akoz, spesyalman bann fe, pour zot kapab koriz bann fo interpretasyon ki ganny met devan. E ki dan sa fason nou pep, i toulstan mars dan lalimyer.

Mr Speaker nou pei, Leta nou pei i enn kot, *rule of law* in vreman etabli. Ozordi tou dimoun i konnen, ki poudir si i annan en lenzistis, i kapab ganny en larepons. Tou dimoun i konnen ki poudir a tou moman prosedir i ganny swiv.

E tou dernyerman mon'n kontan, ki poudir, bann Avoka devan Lakour, e menm bann diferan lenstitisyon in vini, in fer bann demann, pou protez drwa sak endividé.

Konmela ou a krwar in vin en, en demann regilye. E nou bann zanmi dan Zidisyer, demann regilye pou ganny soley. Pou ganny soley, e pou ganny *fresh air*. Tousala i form parti bann transformasyon, ki nou pe fer dan nou pei. Pou nou kapab sanze. Pou nou kapab, avans pli devan.

E alor Mr Speaker mon anvi dir ki tou bann Manm, ki annan sa responsabilite pou mentenir *the rule of law* zot tou zot fer zot travay, dan en fason lib. E pep Seselwa, *State House* i pa en Lakour.

Mwan mon pa en Ziz, pa mwan ki ansarz Zidisyer. Zidisyer i ganny ansarz par Sef Ziz Ronny Govinden e Lakour Dapel par Prezidan Fernando. E la mon anvi fer kler, ki poudir dan tou sa bann lenvestigasyon

e dan tou sa bann *case high profile*, ki pe pase ozordi napa okenn azanda politik.

E mon anvi dir pa fer li politik. E mon anvi osi dir avek bann dimoun ki sey fer li politik. Si zot, zot fer li politik, pa bezwen akiz lezot dimoun pe fer politik.

Mr Speaker nou dan en pei, kot ozordi nou anvi fer sir ki napa okenn *Truth Commission*, ki ganny etablis pli tar dan lavenir. Nou anvi mars dapre Lalwa, dapre nou Konstitisyon, dan en fason drwat, dan en fason kot parey ou menm ou ou'n dir, kot L'Egzekitiv i ganny balanse par Lezislativ. E ki travay ki L'Egzekitiv avek Lezislativ i fer, i ganny *oversight* Zidisyer.

Se sa nou sistenm Gouvernman, e se sa ki nou kontinyen promote. Alors nou espere ki poudir, *Truth Commission*, zot ava fini zot travay sa lannen, e apre sa zot ava prezant zot rapor.

Mon apresye osi travay ki *Ombudsman* in fer, in fek prezant son rapor. E in fer serten propozisyon, e sa bann propozisyon zot ava ganny etidye.

*Human Rights Commission*, obviously zot in pran en novo lelan. E zot travay, la pou lemoman zot in

fer bokou rapor lo leta bann kaso. E mon personnelman mon *welcome* sa bann diferan rapor ki zot in fer. E mon pe ozordi anonse, ki poudir nou dan prosesis pou nou fer en *proper Remand Centre*.

E sa *proper Remand Centre*, i ava lo bann standar enternasyonal. E nou pou konsilte avek *Human Rights Commission* letan nou pe finaliz son bann plan, pou nou fer sir ki zot zwenn bann standar enternasyonal, pour ki napa okenn konplent.

E la Mr Speaker mon anvi dir ki, letan mon ti *Brussels* nou Anbasader Mrs Beryl Samson, ki osi annan sa regar lo *Geneva* kot, tou bann zafer *human rights* i konsernen, in enform mwan ki poudir, pa'n annan okenn konplent, *from* bann dimoun konsernen kot *Human Rights* lo Sesel.

E ki o kontrer, *Brussels* li menm, e osi kominate enternasyonal i tre satisfie avek lafason ki Sesel pe konport li. E tou dimoun i ganny sa drwa pour li eksprim li, pou son drwa ganny enplimante.

Alors Mr Speaker, nou anvi kontinyen ankouraz nou bann lenstitisyon. E nou bezwen pouz zot, donn zot plis, donn zot plis ledan, pou ki zot

fer en travay ki ava vreman donn nou lafyerte.

ACCS definitivman, nou'n vwar li, nou'n vwar zot, en pe pli, en pe plis, sa bann dernyen moman. Atraver sa travay Kont Koripsyon ki zot pe fer. E nou demann zot pou kontinyen fer zot travay, *tout en gardant, the rule of law.*

E ozordi, nou vreman fyer ki Sesel i ganny rekonnnet koman en pei kot napa labi. E sa dan tou bann *Some Enternasyonal*, dan tou bann rankont enternasyonal. E lo nivo Linyon Afriken osi tou, Sesel i sorti laba anler.

E zot in vwar letan mon'n rankontre, *Mo Ibrahim* kot mon'n ganny sans koz lo sityasyon Sesel. E in eksprim son kontantman dan lafason ki Sesel pe *perform*.

Alors Mr Speaker, nou pou kontiny dan sa laliny. E sa i form parti Leta nou Nasyon. Kot napa personn ki pou, napa personn ki pou disparate dan nou pei. Napa personn ki pou ganny arete, e son fanmir pa pou konnen kot i ete. Napa personn ki pou ganny arete e ki pou napa reprezantasyon legal.

Napa personn ki pou pas dan sa bann sityasyon, me nou pou gard nou konman en pei kot drwa sak en endividé i ganny rekonnnet laliberte

lekspresyon sak endividé i ganny proteze e kot nou kapab viv avek tout lafyerte.

Mr Speaker, enn bann size ki byensir konsern tou Seselwa ozordi se kou lavi. Nou tou nou ti ava kontan ki pri lavi ti ava mwen ser. Me malerezman ozordi nou vwar ki pri lavi i kontinyen ogmante. E alor i annan bokou kestyón ki poze.

E mwan mon ganny demann kestyón. Mr Speaker, pep Seselwa annou konpran byen kou lavi ki mannyer i marse. E annou konpran en keksoz.

Pri komodite lannen apre lannen i pou kontinyen ogmante. Sa ki balans sa logmantasyon, se en logmantasyon dan ou lapey. E se sa ki Sesel pa'n kapab fer pandan sa 16 mwan. Akoz nou pa'n kapab fer li? Akoz nou sityasyon ekonomik.

Minis Finans in anonse ki poudir si lekonomi i kontinyen fer byen, sa lannen nou pe regard posibilité donn dimoun en logmantasyon. E sa logmantasyon e sa logmantasyon se pou li kapab koup sa lenflasyon. E alor annou regard en ptit ki'n arive Sesel, kwa ki'n afekte nou?

Premyerman kou komodite lo en nivo mondal in ogmante. Tou Seselwa ki

vwayaze i dir avek ou lontan i ti al *Dubai* i ti ganny sa. Lontan i ti al *Maurice* i ti ganny sa. *Sud Afrique* menm zafer. E zot zistwar se ki ozordi keksoz in ogmante.

Dezyenmman, kou transportasyon bann komodite in ogmante dan en fason konsiderab.

Trwazyenmman kou *fuel* in ogmante, e katriyenmman i osi annan en eleman malonnet parmi serten dimoun ki bann marsan e osi bann endividé. Parske ozordi en Seselwa ki *travel* i dir avek ou i pe al fer en pti debrouy.

E letan i retournen i fer en profi e nou kapab menm dir i touy son frer avek kou ki i vann sa bann keksoz.

Alor Mr Speaker, mon anvi an menm tan ki ot letan nou pe fer sa analiz lo kou lavi, ozordi kot nou pe konplent pou nou zis mazinen - zis mazinen pou en segonn kote nou ti pou ete si sa l'administrasyon pa ti'n pran bann aksyon konkret, pou nou vaksin nou pep, pou nou reouver nou lekonomi, pou nou redonn konfyans bann lenvestiser, pou nou kapab tir sa Dolar R23, R22 pou anmenn li par anba 14.

Pou nou kapab tir sa Ero R25 pou anmenn li lo R16. Zis mazinen kote nou ti pou ete. E

la Mr Speaker letan nou regard zis en keksoz kou transportasyon. Mon bezwen donn zot detay pou zot nobou konpran. Avan *COVID* an 2019, pou ou anmenn *container* 20 pye sorti *Dubai* ti kout \$2200. Ozordi sa menm *container* pou pran *Dubai* pou anmenn isi i kout ant 5400 a \$6000. In plis ki double.

En *container* en *refrigerated container* sorti *L'Europe* avan ti kout €2800 ozordi i ant 5400 a €6200. Ankor enn fwa in double menm triple. Avan *COVID* en *container* 40 pye sorti *Dubai* ti kout an 3800 a \$4000. Ozordi i kout ant 8000 a \$9000.

Ankor enn fwa in double. En *refrigerated container* sorti *L'Europe* avan *COVID* ti kout €4800 ozordi i ant 9000 a €10,000.

Seselwa kou transportasyon i annan en lenpak direk lo pri marsandiz. I annan en lenpak direk. E alor si ou vwar serten komodite i ogmante, pa nou ki pe fer li monte. Me selman se la kot mon'n dir annou mazinen kot nou ti pou ete.

Si nou pa ti'n fer sir sa Gouvernman pa ti'n fer sa travay ki nou'n fer pou nou relans nou lekonomi, pou nou kapab ganny pou nou kapab re-

debout ankor e asire ki dimoun i ganny en lapey. si Dolar ti ankor R22, sa menm *container* ki mon'n fek dir zot taler i ti pou kout R132, 000 pou ariv Sesel.

Me akoz nou'n fer sa Dolar desann i kout R84,000 pou li arive. Savedir nou'n en lekonomi R48,000. Sa menm *container* 40 pye sorti *L'Europe* letan nou fer sa menm kalkil, nou'n fer ki i kout nou R90,000 letan nou pe fer sa *exchange*.

I kout nou R90,000 an mwens ki si nou pa ti'n fer nanryen. Si zis nou ti'n asize, e nou ti'n dir nou annan en pe rezerv, alor Mr Speaker bennzin in mont pandan sa 16 mwan, letan lemonn in konmans sorti dan *COVID* pou li fer pou li rekonomans prodwir, bennzin in mont par 49poursan. Dyezel in ogmant par 97poursan lo *world market*.

E sa *heavy oil* ki nou servi pou nou prodwir elektrisite li in mont par 84poursan. Alor eski nou trouv li drol kou elektrisite in ogmante? Eski nou trouv li drol ki bann servis in ogmante? Eski nou trouv li drol ki pri lavi in ogmante?

Mr Speaker, tou sa bann keksoz ki mon pe dir i an deor nou kontrol. Me selman se la kot STC atraver son programm *RRP* e zot travay dir zot pe

kontinyen fer bann prodwir lo en pri rezonnab.

Zot pe *subsidize* ozordi en kantite bann komodite. E sa pe ede. E ozordi konbyen nou ki pe pran serye sa sityasyon an *Ukraine*, *La Russie* avek *L'Europe*?

Konbyen nou ki pe mazinen ki poudir ki pou son lenpak. E mwan mon ava dir zot, ki poudir pou mon Gouvernman sa i enn bann keksoz ki pe trakas nou en kantite.

Lo kote touris, ki pou arive si lager i deklare? Nou bann touris sa novo *market* ki nou'n gannyen sorti dan les, sorti *Ukraine* avek *La Russie* li menm. Parske letan si lager i deklare *L'Europe* pou met sanksyon. *L'Amerique* pou met sanksyon. E bann *card* ensidswit pou bloke. Alors nou pou nou lendistri touris i kapab soufer.

Lo lot kote *L'Europe* ki *market* ozordi pe grandi sa osi tou i kapab soufer. Alors i pou annan en lenpak direk.

E pep Seselwa ozordi se sa nou pli gran traka konman en Gouvernman. Nou pe byen ale. An Zanye la nou'n ganny nou plis ki 22,000 touris. An Fevriye ankor enn fwa nou pou depas sa sif 20,000. E alors nou pe byen ale.

E parey ki nou ti pe byen ale an 2020 o konmansman e apre *COVID* ti aret tou keksoz nou per ki pou dir si lager i deklare an *Ukraine* e *La Russie* avek *L'Europe* i *involve*, i pou annan en lenpak mondyal.

E pa zis nou Sesel ki pou soufer. E deza la mon anvi dir avek zot ki pri *fuel* in konmans monte. Se pa zis nou Sesel Losean Endyen pou soufer, Lafrik pou soufer. En pe partou kote.

Alors Mr Speaker, mon pe zis mansyonn sa pou mwan *remind* nou tou ki poudir nou form parti sa vilaz global, e ki sa ki arive dan en kwen lemonn i pou osi afekte nou e malerezman Gouvernman Sesel pou napa okenn kontrol lo la.

Speaker ozordi letan nou Nasyon, i donn nou bokou keksoz pou osi selebre. E enn nou bann celebrasyon se *Air Seychelles*. Bann desizyon ki nou'n pran sete bann desizyon ki ti apropriye, ki ti bon e ki ti byen.

Menm si bokou dimoun ti pe dir nou pa konnen ki nou pe fer. Mr Speaker nou ti konnen ki nou pe fer. Letan nou'n vin dan Gouvernman, nou'n trouv nou avek en laliny aeryen avek en det plis ki \$150milyon.

Depi lannen pase, zis konman nou'n antre dan

Gouvernman nou'n konmans travay lo la. Nou'n negosye avek *Etihad* e nou'n osi negosye avek bann *bondholders*.

*Air Seychelles* ti al dan ladministrasyon. Ofet i ankor dan ladministrasyon. Me ozordi nou bezwen selebre akoz atraver nou bann negosyasyon, nou'n reisi *write-off* plis ki \$100milyon det pou *Air Seychelles*!

**(APPLAUSE)**

### **THE PRESIDENT MR WAVEL RAMKALAWAN**

Savedir Mr Speaker nou'n nobou *write-off* R1.5bilyon ki *Air Seychelles* ti dwa. E la mon anvi vreman remersye tou bann dimoun ki'n travay lo la. Mon anvi premyerman remersye nou de administrater, Mr Bernard Pool avek Mr Suketu Patel.

Mon anvi remersye *Board* ek *management* *Air Seychelles*, Minis Hassan, Minis Derjaques, *Designated Minister* ki ti zwe sa rol dirizan.

Mon anvi osi remersye Onorab Bernard Georges ki'n la pou ede dan bann refleksyon.

Tou bann dimoun ki'n zwe en rol pozitiv, mon pa oule mansyonn VP parske *well* li in la lo kote, me VP mon ava donn nou sa pti loner ou osi tou pou tou sa direksyon ki ou'n

donnen. Mon anvi alors Mr Speaker remersye tou dimoun ki'n ede, pou ki ozordi nou trouv nou dan en pozisyon kot letan nou ariv lafen dimwan Mars nou pou'n kapab avek lespwar fini rezourd tou sa bann problem. E *Air Seychelles* son *management* i ava antre pou li kapab kontinyen *manage Air Seychelles*, san ki nou'n bezwen pouz en sel dimoun.

Se sa ki ti pe atann. *Redundancy* par gran group me nou'n reisi fer sa e alor pou mwan i vreman en lafyerte pou nou Gouvernman.

Mr Speaker mon konnen ler pe bouze menm. Me mon anvi senpleman dir ki sa lannen nou programm Lezislatif i enn ki pou ranpli. Deza lannen pase Lasanble Nasyonal li in met en rikord lo lakantite *Bills* ki zot in aprouve e mon kontan poudir ki tou sa bann *Bills* ki zot in aprouve, napa enn ki'n ganny *challenge* devan Lakour Konstitisyonnell. E alor tou keksoz i normal ki vedir ki nou konnen ki nou pe fer.

E la deswit zis enn de bann *Bills* ki *ok* la deswit nou pou annan serten *Bills* ki zot in fini aprouve, ki pou ganny met an operasyon, *Physical Planning Act*, *Civil Status Inquest into Death*, *Domestic*

*Violence*, sa byento la i ava i annan serten ki le 01 Mars pou vin an aplikasyon, kot nou ava kapab pe proteze, protez nou dimoun. I deza annan serten Lalwa ki la devan zot, e ki mon mazinen ki zis konman Lasanble i ava repran zot ava pe travay lo la.

Me bann nouveau *Bills* parmi mon ava zis mansyonn enn de, nou anvi entrodwir en *Fair Trading Commission Bill*, e sa i ava permet ki nou ava kapab regard ankor tou sa ki i annan pou fer avek *Fair Trading* dan nou pei konpetisyon, e proteksyon konsonmater.

E an menm tan osi parey nou'n koze, i annan sa eleman kot nou pou entrodwir en *Fair Trading Tribunal* kot nou pou bezwen travay lo la.

E zisteman dan sa konteks letan nou pe koz *Tribunal*. Enn bann eleman vizavi Zidisyer kot nou pe koze, se pou regarde ki mannyer kapab apwent plis Mazistra. E sa i en konversasyon ki pe *ongoing* e Minis Finans ansanm avek Sef Ziz ek zot ava kapab asize pou koze.

Parske nou anvi met plis Mazistra pou nou kapab fer ladministrasyon lazistis al pli vit. Nou Kod Penal nou pou fer lamannman pou nou adres bann krim ki ganny motive. E

mon'n tann zot pe koz lo la motive par en *bias* swa loriyantasyon seksyel en dimoun ; dezabilite en dimoun. Son ras oubyen son bann krwayans politik. Nou anvi met ledwa lo la pou nou ankor enn fwa kapab viv dan larmoni e se sa ki nou Konstitisyon i osi demann nou.

*Sexual Offenses Bill* kot la ankor enn fwa tou bann keksoz ki i annan pou fer avek bann lofans seksyel, e spesyalman bann ki kont zanfan e bann group vilnerab.

E la mon anvi osi dir ki nou pou regarde ki mannyer dan sa *Bill*, nou pou osi regard konportman dan landrwa travay. E tou dernyerman in annan bann rapor kot bann dimoun spesyalman bann madanm ki travay dan bann landrwa, dan bann lotel zot in konplent. So nou anvi ankor enn fwa adres sa pou nou kapab bouze.

*Citizenship (Amendment) Bill* ki ava donn plis transparans e *accountability*. Letan pe donn sitwayennte. *Bail Bill*, ankor enn fwa i ava fer tou bann prosedir kler. *Passport Bill*. E i pou osi pandan sa lannen annan en onzyenm lamannman Konstitisyon ki pou vin devan Lasanble Nasyonal.

E sa propozisyon i pou swiv bann propozisyon ki *LDS* ti mete dan son manifesto e sa i ava enkli en dat *fix* pour eleksyon. I ava osi regard laprezidans e i ava regard enn de bann lezot size.

E sa ankor enn fwa, nou pou fer li avek apre gran konsiltasyon pou ki tou dimoun i ava kapab donn zot pwennvi. Nou pou anvi etabli en *Sovereign Wealth Fund*. E sa *Sovereign Wealth Fund* i ava fer ki tou bann larzan ki nou anmase ki nou pa ti espekte, nou ava kapab fer sa fon. E sa fon i ava la pou pei. E *Sovereign Wealth Fund* i egziste dan bokou pei, e la mon kapab donn zot en legzanz.

Si letan *Coast Guard* ti fer patrol e i aret en bato ki pe lapes ilegal, e apre sa Lakour i sarz sa bato, sa larzan olye i antre dan *Consolidated Fund* i ava kapab al dan sa *Sovereign Wealth Fund*, ki i ava ede dan bann letan dir nou ava konnen pei i ava konnen ki poudir i ava annan en fon.

E *Small Claims Tribunal* ki ankor enn fwa bann pti *claims* ki parfwa i fer Lakour ranpli avek travay ki ankor enn fwa i ava kapab al en pe bokou pli vit.

I annan bokou bann lezot *Bills* Mr Speaker, e nou ava

pibliy lalis lo tou sa bann direksyon kot nou pe anvi ale. E parmi i osi annan *Private Security Providers Bill* parske la ozordi i annan tro bokou labi tou dimoun i annan en lakonpannyen sekirite, e parfwa i annan en kantite bann manboulouk ki osi arive.

Donk Mr Speaker nou pou regard tre for nou programm Lezislatif. E anvi mon dir avek bann Manm Lasamble mersi davans. Parske mon konnen ki poudir zot pou annan bokou travay.

Mr Speaker vreman i annan en kantite keksoz pou dir. E letan nou pas lo travay ki bann Minister pe fer, e la mon anvi dir avek Lepep Seselwa mersi pou zot bann komanter ki zot anvoy kot mwan, letan zot koz lo bann Minis.

San sa lekip ki otour mwan, nou pa ti pou kapab delivre parey nou pe delivre.

Alor bann Minis mon anvi ozordi devan Lasamble Nasyonal, devan tou bann brans Gouvernman e devan Lepep Seselwa ankor enn fwa sorti dan fon mon leker, pou mon dir zot mersi bokou, pour travay ki zot donnen.

Nou'n la obor kanmarad pandan 16 mwan, pa nou tou ki ti konn kanmarad, me selman nou'n kapab kree en lekip solid

nou ekout kanmarad, nou siport kanmarad, nou donn kanmarad zepol kot nou santi enn nou frer enn nou ser i e pe fatige, oubyen i annan keksoz dan son Minister kot i bezwen siport.

Mon anvi dir zot mersi bokou. An tou ka zot, zot mon lafyerte. Akoz san zot mon prezidans pa ti pou sa ki i ete ziska preznan. Mersi bokou.

### **(APPLAUSE)**

## **THE PRESIDENT MR WAVEL RAMKALAWAN**

Mr Speaker, Sesel i en sanpyon dan bokou sans e ozordi letan ou koz lo sanzman klima letan ou al reprezant Sesel dan bann *forum* enternasyonal, swa ou pe koz lo losean, oubyen ou pe koz lo korperasyon ant *L'Afrique* avek Linyon Eropeen Sesel toultan i sorti tre byen.

E la nou annan lentansyon pou nou kontinyen dan sa direksyon kot i konsern sanzman klima nou pou reste en sanpyon. E parey zot konnen mwan menm mon'n ganny apele pou mon partisip dan sa *UN Decade of the Ocean*.

E nou pe osi ganny apele pou nou letan pe koz lo vilnerabilite, Sesel pti Sessel pe ganny demande pou li vin

partisip lo Komite *United Nations*, pou sey fer en fason pou nou transform sa klasifikasyon *high income, medium income* pou nou kapab pran nou vilnerabilite an konsiderasyon.

Semenn pase, dan sa konferans *Bruxelles Linyon Eropeen* in met en sonm \$150 bilyon a dispozisyon bann pei *Africain, through* sa ki zot apel *The Global Gateway*. E la ankor enn fwa Sesel pou zwe en rol. Letan nou'n koz avek *UNESCO*, e la nou anvi fer en travay vizavi Aldabra.

Aldabra ozordi i en patrimwann mondyal, me nou anvi ki Aldabra i ganny li en nouveau dezinyasyon e sa nouveau dezinyasyon en *biosphere status* i ava fer ki si nou reisi sa i ava vin premye pei ki annan sa doubl *status*.

E an menm tan osi nou pe travay tou pou tou ki *Saya de Malha* ki ozordi Sesel avek *Maurice* pe *manage*, i pa pou zis vin pou nou *manage* son *seabed* avek sa ki anba. Me pou nou osi *manage* delo sa kolonn delo.

E *UNESCO* pe donn nou tou sipor e la ankor enn fwa si nou kapab arrive fer sa e mon krwar ki poudir nou pou ale dan sa direksyon i ava vin premye koridor, *high seas* ki 2

pei i ava ganny sa posibilite pou li *manage*.

E Mr Speaker, partou kote i annan zis sa ki pozitiv. Lagrikiltir nou trouv en nouveau letan. En nouveau lelan sorti kot bann fermye ek bann lenvestiser. Prodiksyon lannen pase in ogmante.

E la nou pe vwar bann fermye pe vin devan ankor pou zot kapab rod plis sipor e nou pe donn zot. E atraver labank nou pe met a zot dispozisyon plis fasilite bann. Nou annan plis later anba kiltivasyon. E tou sa bann diferan proze. E la nou'n vwar nou bann zenn kot *SIAH* pe donn koudmen.

*Foreign Affairs* in transformen konpletman. Bomaten letan mon zwenn - letan mon resevwar Anbasader *Portugal* i dir avek mwan 'chapeau' pou *Foreign Affairs*, akoz i annan en nouveau fason fer. Sa transformasyon in fini arrive.

Ozordi ou ekri en let ou ganny en larepons e apre sa bann proze i kapab bouze. Se menm keksoz ki Anbasader *EU* ki baze *Maurice* in osi eksprimen.

Alor Mr Speaker letan nou pe koz lo sa rekognisyon enternasyonal, letan nou pe koz lo ki mannyer nou pou travay avek nou *diaspora*

atraver *Foreign Affairs*. Tousala i donn nou lankourazman.

E Seselwa ki pe viv dan *diaspora* kwa ki nou'n tande. Mrs Payet *Paris* ki dir mwan mon ti ava kontan ed - rantre an kontak ek Minister Ledikasyon, pou ki letan nou bann etidyan i sorti Sesel zot vin *La France*, mon ava ed zot, mon ava akonpanny zot pou zot etabli zot.

Ki Alain Servina i dir la ozordi i pe travay dan bann *Care Homes*. I anvi vini pou donn en koudmen pou ed bann *carers*, dan *training*. Mon zwenn en lot zenn Seselwa ki dan militer, i en *trainer* ki pe dir be i anvi kapab partaz son konesans. Mon zwenn en *graduate nurse Paris* ki ankor enn fwa i dir, be i ti ava kontan vini pou ed nou bann *nurse* pou zot kapab ganny sa lankourazman pou zot ale.

Mon zwenn en lot zenn fiy Seselwaz, en Avoka ki'n kalifye dan *Internal Law*, ki ozordi dan son *firm* i a pe travay pour *Maldivé*. E i dir kot *International Law* i konsernen, mon pare pou mwan donn mon letan. Ms Mondon vreman *chapeau* pou ou la.

So i annan en kantite Seselwa ki anvi vin donn en koudmen. E se pou sa rezon ki toultan mon proklanmen nou

annan nou en Sesel e en pep Seselwa. Napa divizyon dan nou Nasyon.

Mr Speaker letan nou pe pouse. E se pou sa rezon ki atraver *Foreign Affairs* nou anvi rekonnet nou bann Seselwa ki *perform*.

E la nou pe nou proze pou ki nou annan en *National of merit of the Republic of Seychelles* i byen avanse.

E si tou keksoz i mars byen nou ekspekte ki poudir pou zournen Nasyonal sa lannen nou ava dekor bann premye Seselwa. E i ava annan en komite endepandaman ki ava resevwar bann nominasyon e atraver sa nou ava kapab dekor nou pep Seselwa, pou nou donn valer nou pep Seselwa. Pou fer zot konnen ki poudir letan ou kontribye pou Sesel, Sesel i rekonnet ou.

Regard Larenn, Larenn Elizabeth ki nou swete i ava reganny son lasante. Dan milye son maladi in anvoy en mesaz felisitasyon pou lekip *Britannique* ki dan *Winter Olympics*, akoz zot in ganny en meday lor. E probableman zot pou ganny dekore.

Regard *Cameroon, Senegal* plito ki'n ganny lakoup. Tou zot bann zwer zot in ganny dekore. E nou osi tou nou anvi al dan

sa direksyon pou nou lev nou pep.

Annou siport lafanmir dan tou son dimansyon, nou fanmir ki parfwa i driv en ptigin. Annou donn zot sa lankourazman e la mon fer en lapel avek bann paran pou zot zwe zot rol donn zot zanfan en bon konmansman dan lavi, e se sa ki pou vin lafors, lafors nou sosyete.

Mon ankouraze atraver travay ki bann legliz e bann lezot larelizyon pe fer, pou nobou donn sa moralite kronm dir Monsenyer Harel "pti lepa pti lepa", mon krwar nou ava kapab arrive.

E nou, nou anvi donn nou bann zenn tou sa bann keksoz. E target i reste en meday lor, larzan oubyen bronz Olenpik, en meday Olenpik.

Alor bann zenn *aim* pou sa! *Aim for what is the best.* E anmezir ki zot pran zot letid serye, parey zenn pti Ms Renaud ki'n fer ekstrememan byen, nou anvi osi ki nou bann zenn dan tou fason zot ed zot lekor.

E sa i ava fer Mr Speaker ki letan nou pe koz lo later ek lakaz, bann dimoun i ava kapab letan zot pe ed zot lekor zot ava konnen ki poudir i annan en *clear path*.

E la byento Minis Rangasamy pou vin devan Lasanble, kot i ava prezant nouvo Polisi e i ava ganny sans pou li koz avek tou bann Manm Lasanble, pou donn detay lo ki mannyer sa Gouvernman i anvi ki en dimoun en *graduate* i kapab ganny son later. Ganny en lakaz pou li kapab etablir son fanmir.

Nou pou nepli mars lo sa bann sistenm, kot fodre ou annan sepa konbyen zanfan pou ou gannyen.

Nou anvi dir avek nou bann zenn ki ozordi, ankor enn fwa ler zot koz avek nou, zot dir be nou, nou anvi planifye. Nou pe met nou letid premye. Nou anvi planifye, pour nou kapab apre fer nou lakaz. So tousala se bann keksoz kot nou ava kapab fer li byen.

Mr Speaker, dan lenvestisman, *entrepreneurship* avek lendistri, ankor enn fwa i annan en kantite keksoz ki pe arrive. E la zis pou mwan donn en legzanp.

Lannen pase *IEA* in anmas R22milyon. Konpare avek zis 12 milyon an 2020. Tousala se bann lord ki sa ladministrasyon in gannyen pou li vin mete.

E nou, nou pa pou les tonbe. Nou, nou pou kontinyen fer nou travay pou nou kapab anmenn nou pei devan.

**(APPLAUSE)**

## **THE PRESIDENT MR WAVEL RAMKALAWAN**

So letan nou pe koz lo *Ease of doing business* - 2022, i en lannen aksyon. E la mon espere ki poudir, mon espere ki Ile Eve, nou ava kapab fer bokou lavans. E bann dimoun lo Praslin i ava kapab *move in* pour zot nobou fer sa ki zot devret fer. E tou bann lenvestisman dan pei. Bann proze ki pe *take off*.

Mr Speaker, i ranpli avek pozitivite. Alors mon anvi dir avek pep Seselwa, annou vin pozitiv. Annou akonpanny nou pei.

Letan nou pe koz lo lanplwa. Nou ape koz lo Servis Sosyal. Nou ape koz lo ki mannyer sak endividé i kapab form parti sa kominate. Zwe son rol. Pa zis kale. Pa zis depan lo *welfare*. Me konnen ki poudir ou kapab bouze.

E mon'n fek nonm *IEA*. La Mr Speaker, anvi dir ki lakantite larzan ki lo bann diferan kart ki *ASP* i donnen. Ankor enn fwa i tro bokou. Tro bokou ki pa'n ganny depanse. Savedir, ti annan labi *somewhere*. E nou, nou ape

ankor enn fwa sey fer keksoz bouze.

Gouvernman Lokal. Ozordi i reste zis 3 *MNA* elekte ki pa ankor ganny zot lofis. Larestan tou bann *MNA* in fini ganny zot landrwa.

I reste zis Mont Buxton, La Digue avek Roche Caiman, ki ankor enn fwa i annou tou bann plan. E keksoz pe bouze.

Se sa, sa Gouvernman ki nou pe koz lo la. E sa Gouvernman in met plis larzan dan Bidze, pou ki i ava annan plis bann proze kominoter.

Olye R200mil, nou anvi pandan sa lannen, parey Minis Finans ti anonse. Met R740mil pour bann distrik.

E mon konnen ki poudir Minis Hoareau pe fer sir avek son lekip, ki poudir sa bann proze i bouze.

E letan sa bann proze anba Minister Gouvernman Lokal i bouze, i pou ed tou bann lezot Minister. Parski nou tou nou pou donn en koudmen.

Mr Speaker, Lasante malerezman *COVID* in fer ki nou pa'n kapab met an aplikasyon nou programm.

Akoz? Se parski nou'n bezwen tir bann *staff* dan bann diferan lopital. Dan bann diferan Sant Lasante, pour nou anmenn zot pou pran swen avek sa sityasyon *COVID*.

Swa pou donn vaksen.  
Swa pou fer, pou pran swen dan bann Lopital menm.

Alors la ki *COVID* pe dir nou orevwar. Nou espere avek lagras ki i vreman dir nou orevwar. E ki bann sif pe desann.

Nou espere ki poudir tou sa bann dimoun i ava kapab retourn dan zot bann landrwa travay. E nou Servis Lasante i ava *improve*. E i ava kapab delivre.

Se sa vreman nou lapriyer. Me selman parey mon'n dir, vreman pandan sa bann peryod *challenging*, nou'n kapab fer keksoz bouze.

E la nou *Health Information System*, nou'n fini *roll li out*. E nouveau plan stratezik pour lasante primer, ankor enn fwa Minis i ava ganny sans pou li vin devan Lasanble pou eksplike.

E la mon anvi dir avek pep Seselwa, e osi tou bann Manm Lasanble sa ki mon pe espere, se ki bann Minis, en pe bann keksoz ki mon pe koz lo la. Zot ava kapab vini, eksplike, etale, pour ki dimoun i vreman konnen.

Ozordi nou nouveau *NIHSS*, Lekol Lasante in fini komans konstri. In fini komans konstri.

La Digue, mobilizasyon in fini komans fer. Sa semenn

oubyen semenn prosenn Lopital La Digue i komanse.

E nou espere ki poudir avan lafen sa lannen, nou ava kapab fer omwen en *soft opening* sa Lopital.

E Onorab, mon anvi ki ou anmenn sa mesaz La Digue. Lopital La Digue pou ganny konstri, e i pou ganny fer sa lannen!

**(APPLAUSE)**

### **THE PRESIDENT MR WAVEL RAMKALAWAN**

Letan nou koz lo Lapolis. Mon'n mansyonn en pti git. Me tou bann diferan departman nou ape sey marye pike, pour nou kapab fer keksoz bouze.

Nou konnen ki poudir pa tou landrwa ki pe mars parey i devret marse. Pa tou bann zofisyen ki pe montre sa menm *leadership*. Me selman *leadership* i ape monte.

E ankor enn fwa nou pou met bokou lanfaz lo la. E anba *Internal Affairs*. La nou'n fini komans fer rantre dimoun san bezwen ranpli bann form imigrasyon.

E nou'n war ki mannyer keksoz in al vreman vit. E sa i vreman bon. Nou annan plan pour - *well* nou'n fini idantifye later. Pou ki i ava annan en nouveau *SFRSA Centre*. Pour nou

bann *Fire Brigade*. Kot nou ava sorti laba lo *New Port*. Ki deza en gran danze. E nou ava met li dan en landrwa kot i ava kapab bouze.

*Artisanal fishing.* Byensir nou ape donn tou bann facilite modern. Yer ti annan 9 *plants*. Bann *ice plants*. Sa lannen pou annan 4 nouvo.

E partou kot zot pase zot war. Anse Aux pins, Cascade, Grand Anse Praslin, Baie Ste Anne Praslin. Tousala bann nouvo sant, bann nouvo facilite ki nou pe mete a dispozisyon nou bann peser.

Anmezir byensir ki nou osi ankouraz bann *long liners* an traver bann nouvo *loans*, pour nou kapab annan sa debousman.

E letan nou'n *Brest* nou'n war. Ki poudir zot anvi enport pwason. Me selman nou, nou bezwen vreman angaz nou pou ki dan diversifikasyon nou lekonomi. Nou ava kapab bouze pour nou grandi lo nou negosyasyon avek Linyon Eroopeen. Ankor enn fwa nou ape met en kantite zefor pour nou kapab ganny *the best*.

E parey zot osi konnen nou pe travay for lo *sustainable fisheries*. E nou'n fini lans nou programm.

Parmi bann gro proze ki nou annan. Bann gro proze. I

annan sa *Newport* avek *Airport*. Ankor enn fwa bann negosyasyon pe deza komans fer.

Par egzanp lo *Airport* e osi pour nou kapab demar sa proze Por byento. *Floating dry dock* i enteresan ki mannyer in annan en gran lentere parmi bann envestiser.

In annan plis ki 13 envestiser. Ki letan nou'n lans bann *appels d'offres*, zot in *respond*.

E la mon anvi dir en keksoz. Sa Gouvernman i pou toulstan fer sa. Tou bann proze ki nou pou rantre ladan, spesyalman bann proze kot nou napa larzan.

Par egzanp *multistory carpark, extension jetty lo Inter Island Quay* ensidswit. Enn de sa bann proze nou pour envit bann envestiser pou vini.

E nou ava fer bann *PPPs*. E Gouvernman li i ava ganny en serten facilite. E an menm tan pei li menm li i ava gannyen. So nou pe al ladan e nou pou bouze.

Mr Speaker, letan mon pe konklir, mon anvi dir avek Lepep Seselwa. In napa en moman pli eksitan pou nou apel nou lekor en Seselwa ki ozordi. Nou pei vreman sa gro nyaz nwar ki ti par lao li in ale.

Ozordi letan ou dir ou en Seselwa. Dimoun i regard ou avek lafyerte. Nou ladministrasyon pou kontinyen dan sa direksyon.

E nou Ladministrasyon i kontinyen fer sa lapel pour limite pep Seselwa. Seselwa napa okenn rezon pour nou lager ek kanmarad. Napa okenn rezon pour nou senm rimer lo kanmarad.

Napa okenn rezon pour nou al sakenn son direksyon. Annou koste ansanm. Annou atrap lanmen kanmarad. Annou ed nou frer. Annou ed nou ser. E dan sa fason nou tou nou ava ariv ansanm.

Parey mon'n deza dir sa proverb Afriken i dir avek ou "si ou anvi al vit, al ou tousel. Me si ou anvi al lwen, al ansanm."

Mon envit Lepep Seselwa pour nou kontiny sa larout ansanm dan sa transformasyon.

Kontinyen demann Bondye pou beni nou pei. Ed nou. Donn nou lalimyer. Donn nou laklerte. Vers son lespri lo nou. Sanz nou leker. E fer nou annan en pli gran lanmour pou kanmarad.

Bann ser ek frer, mon'n ganny sa manda, sa misyon, pou diriz sa pei. Mon pour fer li dapre sa manda ki zot in donn mwan. E pour Lepep Seselwa,

pour Sesel, Wavel Ramkalawan pa pou zanmen les tonbe ! Mersi bokou.

**(APPLAUSE)**

### **MR SPEAKER**

*Thank you.* Bon lo lapar Lasanble Nasional e tou son bann Manm. E lo lapar Lepep Seselwa ki zot reprezante, mon a remersye Prezidan pou son diskour, son ladres lo Leta nou Nasyon. Dan ki in partaz son bann obzervasyon, e osi en pe bann plan ki son Gouvernman i anvi antreprann.

Nou pou termin sa rankont la. E nou pou rezwenn Vandredi le 25 Fevriye, 9er bomaten koman Lasanble, pou komans bann repons lo mesaz lo Leta Lanasyon.

Komansan par bann Dirizan dan Lasanble byensir. Swivi par lezot Manm Onorab.

Mon pran lokazyon pou remersye tou bann ki'n ede pou prepar sa levennman ozordi.

E atraver Madanm Clerk e Madanm Deputy Clerk. Mon remersye nou staff sekretarya ki'n travay bokou e dir, pou kapab fer tou keksoz. Met tou keksoz annord pour sa levennman.

I regretan ki nou ankor akoz COVID, lo sertern restriksyon. Ki nou rankont pa

kapab pran tou lanpler ki i ti kapab pran. Me fotespere nou ava annan keksoz ki nou kapab fer byento ler nou'n met *COVID* deryer nou.

Mon le remersye osi letan bann lorganizasyon ki'n asiste nou. Sirtou Lapolis avek Gard Donner. E avek *band* mizikal ki'n met en pe lafanfar dan nou seremoni.

Mersi bokou tou dimoun. Mersi bann envite pour zot partisipasyon. Mersi pep Seselwa ki'n swiv nou. E nou apresye touzour, ki zot la pou montre zot lentere. E pou zwenn nou dan lespri nou travay.

Mon swet zot tou bonn sware e bonn kontinyasyon travay. Nou ava *adjourn*.

**(ADJOURNMENT)**